

太康縣志

第四冊

太康縣志

總目

圖片

縣全境圖 縣城圖 河圖流 修志館職員 縣黨部 縣政府 中山 公園 教育

局 教育建設局 孔子廟 民衆教育館 林場 縣黨部平面圖 中山公園平面圖 縣立中學

平面圖 九區富力比較圖

卷一 通紀

卷二 輿地志

卷三 政務志

卷四 教育志

卷五 藝文志上

卷六 藝文志下

卷七 職官表 附宦績略

大周縣志

卷八 出身表

卷九 人物傳上

卷十 人物傳下

卷十一 列女傳

卷十二 縣志始末

太康縣志

卷十

息縣 劉盼遂撰

人物傳

下

唐

劉玄佐本名洽滑州国城人少倜儻不自業爲縣捕盜犯法吏笞辱幾死乃亡命從永平軍稍爲牙將大歷中李靈耀據汴州反玄佐乘其不備襲取宋州有詔以州遂隸其軍節度使李勉即表署刺史德宗建中初進兼御史中丞充宋毫潁節度使時李納叛李洧以徐州歸納急攻之詔玄佐援洧大破納兵斬首萬餘級東南饒漕乃通進圍濮州徇濮陽皆下再降其守將遂通濮陽津遷檢校兵部尙書兼曹濮觀察淄青兗鄆招討使汴滑都統副使李希烈反玄佐與李勉等聯兵屯淮汝數困賊帝在奉天垂意關東乃詔檢校尙書左僕射同中書門下平章事希烈攻陳州玄佐救之希烈走遂進取汴州

詔加汴宋節度使陳州諸軍行營都統至是賜名玄佐以尊寵之入朝復兼
涇源四鎮北廷兵馬副元帥檢校司徒性豪縱輕財好厚賞故下益困汴自
李忠臣以來士卒驕不能自還至玄佐彌甚其後殺帥長大鈔劫狃於利而
然也玄佐貴母尚在賢嬪人也常月織絁一端示不忘本數教敕玄佐盡臣
節或傳寺中佛軀汗流玄佐自往大施金帛於是將吏商賈奔走輸金錢恐
後十日玄佐敕止藉所入得巨萬因以贍軍其權譎類若此初李納遣使至
汴玄佐得其陰謀故納最憚之卒年五十八贈太傅諡曰壯武

唐書藩鎮傳
舊唐書卷

以下百四十五
傳同

劉士寧玄佐子玄佐薨子墻及親兵擁士寧爲留後士寧乃以財物分賜將士
請之爲帥德宗從竇參計授士寧起復金吾衛將軍同正汴州刺史宣武軍
節度等使士寧初授節鉞諸將多不悅服性忍暴淫亂或彎弓挺刃手殺人
于杯案間每出畋獵數日方還軍府苦之貞元十年爲其大將李萬榮所逐
廢處柳州

李萬榮與玄佐同里相善寬厚得士心玄佐引爲大將及士寧去其兵權萬榮伺隙逐之詔授萬榮宣武軍兵馬留後貞元十一年五月授宣武軍節度使八月萬榮病遂署其子迺爲司馬其大將李湛以軍士逐出李迺執送京師杖殺萬榮以其日卒

韓海陳州太康人爲人魁偉沈塞以武勇游仕許汴之間寡言自可不與人交衆推以爲長者官至游擊將軍贈太師娶鄉邑劉氏女生子弘是爲齊國太

夫人夫人之兄曰司徒玄佐

韓昌黎集許國公韓弘神道碑

韓宏滑州匡城人少孤依其舅劉玄佐舉明經不中從外學騎射由諸曹試大理評事爲宋州南城將事劉全諒署都知兵馬使貞元十五年全諒死軍中思玄佐以宏才武共立爲留後請監軍表諸朝詔檢校工部尙書充宣武節度副大使知節度事先是曲環死吳少誠與全諒謀襲陳許使數輩仍在館宏始得帥欲以忠自表於衆即驅出少誠使斬之選卒三千會諸軍擊少誠敗之汴自劉士寧以來軍益驕及殺陸長源主帥勢輕不可制宏察軍中素

恣橫者劉諤等三百人一日數其罪斬之牙門流血丹道宏言笑自如自是
訖宏去無一敢肆者李師古屯曹州以謀鄭滑或告師古治道矣兵且至請
備之宏曰師來不除道也師古情得乃引去累授檢校司空同中書門下平
章事宏以官與太原王諤等詒書宰相恥爲諤下憲宗方用兵淮西藉其重
更授檢校司徒班諤上嚴綬以王師敗乃拜宏淮西諸軍行營都統使扞兩
河而令李光顏烏重允擊賊宏不親屯遣子公武領兵三千屬光顏然陰爲
逗撓計每諸將告捷輒案日不怡元濟平以功加兼侍中封許國公李師道
誅宏大懼因請入朝册拜司徒中書令以足疾命中人掖拜固願留京師帝
崩攝冢宰俄出爲河中節度使以病請還復拜司徒中書令卒年五十八贈
太尉諡曰隱宏爲人莊重寡言罪殺人問法何如不自爲輕重沈謀勇斷故
少誠師道等共憚之詔使至或驚侮不爲禮齊蔡平勢屈而後請覲然天子
尊寵異等能以名位始終亦其天幸

韓公武字從偃弘子起家衛尉主簿署宣武行營兵馬使以討蔡功授檢校左

散騎常侍鄆坊等州節度使深懼盛滿乞罷入爲右金吾將軍轉右驍衛大

將軍性恭遜不以富貴自處先父暴卒贈戶部尚書諡曰恭子紹宗嗣

唐書本傳

韓充本名瓘宏弟也少亦依舅家李元爲河陽節度使署牙將元改昭義又從之元嘗謂賓佐曰充後當貴諸君必善事之未幾宏領宣武召主親兵元曰我知君舊矣吾兒不才無足累君者二女方幼以爲託遂辭去累授御史大夫宏峻法人人不自保充謹慎無少懈怠宏在鎮久不入見天子身又得士不自安因請入宿衛宏許之不即遣後因獵單騎走洛陽朝廷亮其節擢右金吾衛將軍轉大將軍斥軍士虛名不如令者七百人歷少府監鄆坊等州節度使穆宗立幽鎮魏復亂王承元以冀兵二千屯滑州朝廷恐冀兵相誅爲叛徙承元鄆坊而授充檢校尚書左僕射爲義成軍節度使會汴軍逐李愿以李齊主留事帝謂充素爲汴士悅向詔節度宣武兼統義成討齊戰郭橋破之會李質斬齊遂入汴初陳許李光顏亦奉詔討齊屯尉氏意先得汴欲俘掠以餌軍而汴監軍姚文壽亦欲納光顏充聞其謀馳至城下汴人望

見充歡躍無復貳者始帝遣人問破賊期充對汴天下咽喉臣頗習其人然王師臨之一月可破方二旬即克帝喜曰充料敵如神加檢校司空籍寮所脅爲兵者三萬悉縱之又責首亂者千餘斥出境令曰敢後者斬由是內外安堵汴人愛賴之卒年五十五贈司徒諡曰肅充雖將家性儉節歷三鎮居處服玩如儒生乘幾決策無餘悔世推善將李元沒充爲嫁二女周其家盼遂按韓愈昌黎先生集卷三十二司徒兼侍中中書令贈太尉許國公韓弘神道碑銘首云韓姬姓其先有自潁川徙陽夏者其地於今爲陳之太康太康之韓其稱盖久然自公始大著父海娶鄉邑劉氏司徒玄佐之女弟也考愈與弘父子同參淮蔡之役故於平淮西碑中盛推其功所言玄佐弘父子里貫自可信保若新舊唐書皆誤以爲滑州匡城人者亦自有故據樂史太平寰宇記卷二太康縣下云隋開皇十八年改爲匡城縣至大業十三年李密舉兵於此遂廢盖匡城以李密發難而得名於鄉鄙勇武之間故玄佐弘等沿俗稱匡城以自跂修史者不審於此遂以隸之滑州而不知其非矣

附錄韓愈贈太尉許國公神道碑銘

韓姬姓以國氏其先有自潁川徙陽夏者其地於今爲陳之太康太康之韓其稱蓋久然自公始大著公諱弘公之父曰海爲人魁偉沈塞以武勇遊仕許汴之間寡言自可不與人交衆推以爲鉅人長者官至遊擊將軍贈太師娶鄉邑劉氏女生公是爲齊國太夫人太夫人之兄曰司徒元佐有功建中貞元之間爲宣武軍帥有汴宋毫潁四州之地兵士十萬人公少依舅氏讀書習騎射事親孝謹嵬嵬自將不縱爲子弟華靡遨放事出入敬恭軍中皆目之嘗一抵京師就明經試退曰此不足發名成業復去從舅氏學將兵數百人悉識其才鄙怯勇指付必堪其事司徒嘆奇之士卒屬心諸老將皆自以爲不及司徒卒以爲宋南城將比六七歲汴軍連亂不定貞元十五年劉逸淮死軍中皆曰此軍司徒所樹必擇其骨肉爲士卒所慕賴者付之今現在人莫如韓甥且其功最大而材又俊即柄授之而請命天子天子以爲然遂自大理評事拜工部尙書代逸淮爲宣武軍節度使悉有其舅司徒之兵與地衆果大悅便之當此時陳許帥曲環死而吳少誠反自將圍許求援於逸淮使數輩在館公悉驅出斬之選卒三千人會諸軍擊少誠許下少誠失勢以走河南無事公曰自吾舅沒五亂於汴者吾苗薨而髮櫛之幾盡然不一擯刈不足令震駭命劉鏐以其卒三百人待命於門數之以數與於亂自以爲功並斬以徇血流波道自是訖公之朝京師念有一年莫敢有譴呶呌號於城郭者李師古詐言起事屯兵於曹以嚇滑帥且告假道公使謂曰汝能越吾界而爲

盜邪有以相待無爲空言滑帥告急公使謂曰吾在此公無恐或告曰剪棘夷道兵且至矣請備之公曰兵來不除道也不爲應師古詐窮變索遷延旋軍少誠以牛皮鞣材遺師古師古以鹽資少誠潛過公界覺皆留輸之庫曰此於法不得以私相餽田宏正之開魏博李師道使來告曰我代與田氏約相保援今宏正非其族又首變兩河事亦公之所惡我將與成德合兵討之敢告公謂其使曰我不知利害知奉詔行事耳公若北過河我即東兵以取曹師道懼不敢動宏正以濟向之誅吳元濟也命公統諸軍曰無自行以遏北寇公請使子公武以兵萬三千人會討蔡下歸財與糧以濟諸軍卒擒蔡姦於是公爲侍中而以公武爲鄆坊丹延節度使師道之誅公以東下進圍考城克之遂進追曹曹寇乞降鄆部既平公曰吾無事於此其朝京師天子曰大臣不可以暑行其秋之待公曰君爲仁臣爲恭可矣遂行既至獻馬三千匹絹五十萬匹他綿紉綺纈又三萬金銀器千而汴之庫廩錢以貫數者尙餘百萬絹亦合百餘萬匹馬七千糧三百萬斛兵械多至不可數初公有汴承五亂之後掠賞之餘且歛且給恒無宿儲至是公私充塞至於露積不垣冊拜司徒兼中書令進見上殿拜跪給扶贊元經體不治細微天子敬之元和十五年今天子卽位公爲冢宰又除河中節度使在鎮三年以疾乞歸復拜司徒中書令病不能朝以長慶二年十二月三日薨於永崇里第年五十八天子爲之罷朝三日贈太尉賜布粟其葬物有司官給之京兆尹監護明年七月某日葬於萬年縣少陵原京城東南三十里楚國夫人翟氏附子男二人長曰肅元某官次曰公武某官肅元早死公

之將薨公武暴病先卒公哀傷之月餘遂薨無子以公武子孫紹宗爲主後汴之南則蔡北則鄆二寇患公居間爲已不利卑身佞辭求與公好薦女請婚使日月至既不可得則飛謀釣誘以間染我先事候情壞其機牙姦不得發王誅以成最功定次孰與高下公子公武與公一時俱授弓鉞處藩爲將疆土相望公武以母憂去鎮公母弟充自金吾代將渭北公以司徒中書令治蒲于時弟充自鄭滑節度平宣武之亂以司空居汴自唐以來莫與爲比公之爲治嚴不爲煩止除害本不多教條與人必信吏得其職賦入無所漏失人安樂之在所以富公與人有畛域不爲戲狎人得一笑語重於金帛之賜其罪殺人不發聲色問法何如不自爲輕重故無敢犯者其銘曰在貞元世汴兵五裨將得其人衆乃一楊其人爲誰韓姓許公儼其梟狼養以雨風桑穀奮張厥壤大豐貞元玄孫命正我宇公爲臣宗處得地所河流兩壩盜連爲羣雄唱雌和首尾一身公居其間爲帝督姦察其囁呻與其睨眄左顧失視右顧而踞蔡先鄆鉏三年而墟稿乾四呼終莫敢濡常山幽都孰陪孰扶天施不留其討不逋許公預焉其責何如悠悠四方既廣旣長無有外事朝廷之治許公來朝車馬干戈相乎將乎威儀之多將則是已相則三公釋師十萬歸居廟堂上之宅憂公讓太宰養安蒲坂萬邦絕等有弟有子提兵守藩一時三侯人莫敢攀生莫與榮歿莫與令刻文此碑以鴻厥慶

宋

沈倫字順儀開封太康人少習三禮於嵩洛間講學自給漢乾祐中白文珂鎮陝往依之與宣徽使咎居潤善薦辟宋太祖同州幕府繼署滑許宋三鎮從事掌留後財貨以介聞太祖受禪召爲戶部郎中奉使吳越歸奏便宜屬揚泗間饑長史言郡中軍儲尙百餘萬皆陳腐儻以貸貧民至秋收新廩公私俱利朝議難之太祖以問倫對曰國家以至恩溥民自當感召和氣豈復慮意外邪上遽命發廩貸民建隆三年遷給事中明年爲陝西轉運使王師伐蜀改隨軍水陸轉運使諸將入成都競取玉帛子女倫獨寓僧舍潔躬糲食有獻珍異峻拒之東歸纔圖書數卷而已上知之擢爲戶部侍郎樞密副使親征太原領大內都部署權留司三司事開寶六年拜中書侍郎平章事集賢殿大學士兼提舉荆南劍南水陸發運事雩祀西洛以倫爲東京留守兼大內都部署俄召赴行在令預大禮太宗初加右僕射兼門下侍郎監修國史有事太原復留守判開封府事師還論功加左僕射五年監修太祖實錄成賜襲衣金帶六年加開府儀同三司以疾請告明年坐與盧多遜同列不

能覺察責降工部尙書落子繼宗職未幾致仕上念倫舊臣遽復繼宗官以慰其心薨年七十九贈侍中諡恭惠繼宗字世卿廕補西頭供奉官加朝散大夫知浚儀縣轉屯田郎中至道末領淮南轉運有疾以將作監致仕東封起歷太僕光祿二少卿判三司勾院卒年五十六女爲眞宗貴妃三子惟溫至秘書丞惟清內殿承制惟恭將作監簿

宋史二百六十四本傳

謝絳字希深其先陽夏人祖懿文爲鹽官令葬富春遂家焉父濤進士以文行稱直昭文館終太子賓客絳初以廕試校書郎登第知汝陰縣楊億薦其文召試擢秘閣校理通判太常禮院母憂服除遷太常博士尋通判常州疏陳水旱仁宗納之擢國史編修祠部員外郎直集賢院父老乞便養通判河南雖居外猶數論事權開封府判官值蝗變上言吏不稱職語極剴切郭后廢陳白華之詩以諷徙三司度支判官兵部員外郎進聖治箴五篇父憂服除擢知判誥制流內銓吏部擬官舊視職由有無不問多寡以是不均絳爲覈其實以多寡爲差有名無實者皆不用人以爲便改判太常禮院知禮儀事

使契丹還調知鄧州引美陽堰水注鉗盧陂溉田三萬頃請修復召信臣六門堰未就而卒年四十六絳爲人修潔蘊藉所至大興學舍在河南修國子學諸生自遠至者數百人好施宗族家無餘貲有文集五十卷子景初景溫景平景回景平好學終秘書丞景溫登進士歷京西淮南轉運使

宋史本傳

謝師復 黃庭堅豫章黃先生文集卷二十六跋邢居實南居賦後云陽夏謝師復景回年未二十文章絕不類少年書生語余嘗序其遺藁云方行萬里出門而車軸折可爲實涕今觀邢惇夫詩賦筆墨山立自爲一家甚似吾師復也

元

韓克昌唐節度使充之後以孝廉辟歷河南陝西二憲司掾尋進刑部臺省持正不撓擢刑部主事有兄弟五人爲盜法當死克昌曰弟從兄者也此不幾于族乎乃議宥最幼弟上可其言拜爲監察御史卒於官

韓元善字大雅克昌子由國子監生積分中程釋褐除新州判官累擢江南行

臺監察御史歷中書左司郎中吏部侍郎吏部尙書僉樞密院事至正三年拜中書參知政事五年遷大司農卿尋出爲江南行御史臺中丞燕南肅政廉訪使九年召拜中書左丞同知經筵事十一年丞相脫脫奏事內庭以事關兵機而元善及參知政事韓鏞皆漢人使退避勿與俱由是遂與右丞玉樞虎兒吐華同分省彰德以給餽餉十二年御史大夫也先帖木兒總兵討汝寧元善至衛輝以病卒元善性純正明達政體敷歷臺閣三十餘年遂躋丞轄以文學治才羽翼廟謨論議之際秉義陳法不徇向上官國是所在倚之以爲重嘗以謁告侍親居家效范文正公遺規置田百畝爲義莊以贍周貧族至正交鈔初行賜近臣各三百錠元善復以買田六百畝爲義塾延名士以教族人子弟云

元史一百八十四本傳

姚斌字全才山東博興人元壬午翰林官中書兄弟三人斌其季也元末羣雄

起斌偕二兄避兵饒陽一時不能相保遂判鐵器

傳門說係鐵鍋

爲三各執其

一而分袂斌攜妻魏氏轉徙太康縣西北會城岡寺中久而村人始知爲元

遺臣蓋斌初至與農夫伍翛然自得未嘗自言其曾作官人也村人馬姓者甚優禮之遂家焉明洪武戊申年屢詔不應率三子圭冕貴躬耕樂道不求進取臨終遺囑有但讀書勿應試之語迄今岡東尙有其墓子孫繁衍連村遂成太康望族云

出族譜

王元佐字彥才由徵辟任河南裕州判陞濠州定遠縣尹以事調山東鹽運司官臺場令尋陞通州同知終奉訓大夫彰德路判所至皆有惠政以孫淪貴贈通議大夫戶部右侍郎順帝至正間太康大饑元佐令家人自淮西運米千餘石賑濟鄉人全活者甚衆子孫繁衍簪纓接武人以爲積善所致後迨明成化戊子河南歲饑開封府金守檄西華知縣陳嘉謨以元佐運米賑濟並饒州富民段二十八閉難有火災刊爲善惡圖以喻部民至今猶存

明

王純字士魯元末隱居龍門教授洪武三年徵至京師授禮部主事擢吏部郎中歷大名府長沙府通判陞福建參議參政右布政撫麓川陞浙江左布政